

In mais da pais

Las lingias grassas e finas dal mars 2020

DAVID TRUTTMANN/FMR

Per l'amur da Dieu – co diavel fissi da far ina resumaziun da quest davos mais? Co diavel fissi da chattar il dretg tun? – Avant exact in mais avevan nus scrit a la fin da questa rubrica da revista: «Ed alura gea, il virus da Corona ha spluntà vi da la porta grischuna. Però sur da quai datti da scriver segiramain dapli il proxim mais.» – Pelvair, igl ha dà da scriver bler quest mais da mars 2020 davart il coronavirus. Però i n'è betg pli stà uschè lustig!

Il coronavirus ha spluntà be curt vi da la porta grischuna ed è alura entrà senza spetgar! El ha mess sin il chau noss mintgadi, mess en privel vitas e mess ina fin ad autras vitas. L'entschatta dal mais hai entschet cun quatter cas d'infecziun tar ina famiglia da turisti talians en Engiadina. Ussa, la fin dal mais mars datti sulettamain en il Grischun var 500 personas testadas positiv (bleras personas na pon gnanc pli far in test) ed ina dunsaina da mortoris. Quest virus microscopic s'ha derasà dapertut, da la Bregaglia enfin en Lumnezia. E tenor ils experts n'ha l'unda d'infecziuns anc betg cuntanschi il punct culminant. Però nus essan en Grischun ed en Svizra apparentamain anc bain servids e preparads, congualond cun las tragedias en Italia, Spagna ubain en ils Stadis Unids.



Turnain tuttina enavos tar nus: Tge è tut capità quest mais en connex cun il coronavirus? Ina selecziun causala: Territoris da skis, hotels e museums èn vegnids serrads. L'economia privata pitescha, sco p.ex. la chascharia da Savognin che n'ha betg pudì furnir 370 kg chaschiel al salun d'autos a Genev-

ra – annullà sco tuttas autras occurrenzas grondas dal proxim temp. Sin la glista prominente e main prominente da spustaments u annullaziuns sa chattan tranter auter era las festas da musica a Vignogn, las confirmaziuns en Val Müstair, la cursa tradiziunala da Beni Cathomas, il campiunadi mundial da ho-

ckey ed insomma l'entira vita publica. Il biro gigantic «Sinergia» dal Chantun vegn emplenì pir questa stad enstagl da quest avrigl. E sche il home-office dals emploiads chantunals ha plain success, alura resta la «Sinergia» a la Ringstrasse forsa perfin vida per adina – tgi sa? Las baselgias fan messa e pregia via

youtube, sco a ses temp il famus «Gloria TV» si Tujetsch. Ed er il professor da rumantsch emprova da smatgar la prelecziun da las smaledicziuns da Giacumbert Nau tras ils cabels, quasi «Greina TV». Entant producescha la Hamilton a Panaduz di e notg apparats da respiraziun. In veritabel «mund sutsu».

In mument pudain nus bain anc ans prender enavos ed ensemen e tegnair ora quest «mund sutsu». Però quant ditg? Restads èn ils plets ch'in pur da Solas ha ditg envers la FMR enturn la mesadad da matg: «Da star a tgesa ins vegn balurd!» – Exact, a lunga vista duvrain nus in l'auter, nus stuain pudair ans dar il maun ed embratschar, far viva, nus vulain rir e cridar ensemen, ans visitar, ans radunar, ans dispartir e dar curaschi.

Vulain sperar ch'i dettia da scriver di per di pli pauc da quest benedì virus.

In mais da pais

(fmr/dat) Tgeninas èn stadas las lingias grassas e finas dal mais passà en Rumantschia, en Grischun ed insomma? Quai ans dumandain nus da la FMR mintga fin dal mais. Tge paisa e tge paisa mo in zichel? Nus laschain repassar schabetgs, dain ina survista fitg casuala e commentain quai. Mais per mais illustrescha il Bregagliot rumantsch Jon Bischoff il «Mais da pais» cun in «schurnal grafic»